

## Abschrift der Vorrede D. M. L.

Darumb wird sichs fürwar nicht thun / das man nu  
mehr / solchen Teuffels Köpffen solte des Glaubens Sa-  
chen befehlen / Sondern die Könige / Fürsten vnd Bischof-  
fe müssen selbs drein sehen / damit nicht deßgleichen oder är-  
gers aus diesem Concilio folge / Gott hat fürwar am Co-  
stenser Concilio wol beweiſet / wie er den Hoffertigen wi-  
derstehe / vnd zerstreue alle die so hoffertiges Sinnes sind /  
vnd gar nach niemand frage wie groß / vnd wer er sey.

Das ist die Ursache / warumb ich diese Brieffe lasse  
außgehen / Nämlich solche Vermahnung / wer nicht wil / so  
viel mal gebrand / witzig werden / der fahre immer zum Teu-  
fel hin / er verdirbt / ohn meine schuld. Unser lieber Herr  
Jesus Christus gebe vns seinen Geist zu beten / vnd denen /  
so das Concilium regiren sollen / zu suchen was Got-  
tes ist / vnd zu vergessen oder verachten /  
was ihr eigen ist /  
Amen.



Abschriefft